

El guèniou d'Kristoff.

Bî ouèye,l'histwoire es' répète:Comme Bobo,il a chinq ans,Kristoff a dèmousquiné s'guèniou! *

Les circonstances èn'sont nî tout à fait les min-mes.

Pou couminchî,ça s'a passé long dè d'çi:à Courchevel,adon qu'l s'préparoût à r'vèni d'condjî.

El version officielle,ç'est qu'in kertchant les bagâdjes dins l'auto,il a scliné su n'plaque dè warglas èyè il est tcheû.

Quand d'ai racontè ça au Gros Zante,il a frougnî ses soûrcis in m'demandant si l n'avoût nîn in aut' esplicâtion.Comme ç'es't'in spécialisse in suppositions, min-me in "supputations",du l'l'ai laiché dire.

-Supposons qu'vo parrain-pusquè ç'est vo parrain-avoût n'guinse:I s'a ingambiyî dins les valises èyè berdanf!

-Non,Zante:Primo,du n'ai jamais vu Kristoff avû ène guinse;il a des cîns qui ont asprouvé d'li in fout' yeune mais cî toudi li qui l'z'es r'mènoût à browette à l'fin dè l'sèyance.Deuzio:à ç'n'heûre-la èyè djusse avant d'min-nér s'n'auto,ça n'correspond nî du tout au gaillard!

-Bon,supposons qu'il a cwoisé dins l'escailler ène pépée in maillot d'bain: I s'a r'tourné pou ravisér l'face arrière dè l'djin èyè il a roubliyî l'dernière marche.Berdanf!

-Quand aux sports d'hivier,il âra des pépées in maillot d'bain,les lapins diront pund' dins les arb's.In pusse,l faudroût branmint pusse què ça pou li fait pierd' el' tiesse.

-Bon,I s'toût p'têt' énérvé au possîb'?I n'avoût nî seu fai l'fiesse dè St Valentin avû vous-aut's ou bîn,despûs qu'il î l'vé,es feume li in d'avoût fait vire pire qu'à pind'.Elles sont testoutes ainsi:N'roubliyèz nî qu'il a co astant d'kilomèt's à fait.I vo faura co arrêter trois coûps pou fai pipi. N'eskèttèz nîn l'cadeau d'matante Zélie sinon,ç'est mi qu'ârai l'air biesse.En'salissèz nî vo prop' maronne.Etc...


Bref,il avoût n'tiesse comme ène cuvelle su l'feu èyè berdanf!

-Ascutèz Zante,vo couminché à m'souyî les pènas avû vos "berdanf".

Disons simplèmint qu'il a mis s'pîd ayusqu'l n'falloût nî,qu'il a glichî èyè ç'est tout'.Vo avèz bîn tcheu su vo kwesse el sèmène passée in dallant vire à l'boîte si l'facteur î passé!Ed'mandè m' putôt commint ç'qu'l va.

-Ouèye,ç'est vrai.Commint ç'qu'I va?

-Kristoff va fin bîn! D'ai sté l'vire dè l'sèmaine:in vrai pacha!
 Bîn seûr,il es't'in p'tit coûp malheureux pasquè I n'sait pu couri comme ène rate dins tous les coins.Il a min-me du barrér deux-trois z'affères dins s'n'agenda.
 Comme I n'a jamais yeu n'mentalité d'assisté,I n'aime nî branmint dè d'voir ed'mandér pou d'allér li quère des papîs in whaut dè l'gardè-robe ou bîn n'casserole dins l'fin fond d'l'armoire.
 Sinon,il est wasté pire qu'ène matante à héritâdje!



Pou couminchî,es'gamin,ç'es't'in kiné.Donc,il est massé,manipulé, stindu,rintassé,desplouyî in tims èyè in heûre.
 Eyè si jamais,il avoût des complications,es' fille est vètèrinaire!
 Mais,el' pu dèvouée dins l'djeu,ç'est s'feume:Elle prend soin d'li comme in infant avû s'prumî nounours.
 Il a froûd?Elle ermet n'gayette su l'feu!
 Il a cau?Elle li fait d'air!
 Il a soû?Elle inkeûrt erquer l'bouteille d'Augrenoise qu'elle a mis au frêche!
 Il a faim?Elle li apporte ène pètte assiette comme à l'apèritif!
 Toutes les deux minutes,elle li d'mande si ça va,si I n'li faut rîn.Mi,à s'place, d'aroû co du mau à mè stampér pindant deux trois s'mènes!

En cwoyèz nî ça Françwès,d'ai counneu ça avû Fine.Au dèbut,vo pinsèz yesse in vacances avû l'formule "all inclusive" mais à la longue,vo couminchèz à d'avoû vo compte. Ene feumme,surtout si elle vo z'ain-me branmint,elle in fait toudi n'bèquée d'trop pou yesse seûre dè d'avoû fait assez.In pusse-èyè ç'est là l'drame-ène feume,ç'n'est nî comme ène tèlevision.I n'a nî moyîn d'coupér l'son!

Vo z'avèz p'têt' raison Zante mais mi,du trouve qu'l vaut mieux ça què l'contré.

Comperdèz bîn qu'in ostil qu'on n'ravise pus,l va rouillî,l va cwoire qu'l n'compte pus pou personne èyè l'djoû qu'on d'âra dandjî,l scapra d'vos doûgts.

Ene pètte preuve d'amour in vo l'vant au matin,ç'est meilleu qu'in grand pot d'Ovomaltine pou intamér vo djournée!

In ravisant pa l'ferniesse,du vois qu'l fait tout blanc:Wétèz bîn à vous-aut's in avançant.l n'faut quèqu'fois nî dallér long pou squèttér s'front.

A l'prochaine.

Françwès.

*Vu les nombreuses "similitudes",je joins une archive (rafraîchie) qui avait fait grand bruit en mai 2000 et qui s'intitulait:

El guèniou d'Bobo.

Dèmousquinér = démantibuler/sclinér = glisser(sur de la glace.cf "dallér à sclane"/tchére = tomber/frougnî = froncer/asprouvé = essayer/pund' = pondre/souyî les pènas = litt. Scier les ailes,soit embêter/kwesse = coude/quére = chercher/avoû dandjî = avoir besoin/scapér = échapper.